

## **INICIJATIVA ZA IZMJENU PRAVILNIKA O DODJELJIVANJU ID BROJEVA, REGISTRACIJI I IDENTIFIKACIJI I EVIDENCIJAMA POREZNIH OBVEZNIKA NA TERITORIJI FBiH**

Novim Pravilnikom o dodjeljivanju identifikacionih brojeva, registraciji i identifikaciji i evidencijama poreznih obveznika na teritoriji FBiH ("Službene novine FBiH", broj 69/17 od 13.9.2017. godine) uvode se novi nameti na poslodavce.

**Umjesto pojednostavljenja procedura i rasterećenja privrede navedenim Pravilnikom uvode se dodatna opterećenja poslodavcu. Komplikovane procedure ogledaju se u uvođenju obaveze za posjedovanje ID broja od strane svih poslovnih jedinica koji se smatraju mjestom poslovanja, kao i proširenje dodatne dokumentacije te prebacivanje obaveze dokazivanja ispunjavanja uslova za dobijanje ID broja sa PU na poslodavca.**

**Dodatno opterećenje i parafisikalni namet predstavlja obaveza ovjere i notarske ovjere dokumentacije. Svaka ovjera dokumentacije se plaća u iznosu 2-10 KM a notarske ovjere koštaju 4-10 KM.**

Nije nam jasno da u vremenu modernih tehnologija kada postoji elektronski potpis i kada je potrebno raditi na uvođenju i unaprijeđenju elektronskih sistema, donosioci podzakonskog akta uvode postupak i procedure koje su zemlje EU napustile prije nekoliko decenija. Dakle, uvodi se obaveza dostavljanja dokumentacije koju već ima nadležni organ za registraciju te obaveza ovjeravanja dokumentacije.

Posebno moramo napomenuti da su ovakva rješenja suprotna Strateškom planu PU FBiH za 2014-2018 prema kojoj je jedan od ciljeva PU unaprjeđenje informacionih komunikacionih sistema Porezne uprave Federacije BiH, u cilju stvaranja boljih uslova za korištenje informacionih sistema i stvaranje povoljnijeg poslovnog ambijenta.

Posebno ističemo odredbe 25. i 27. Pravilnika u kojima se uvodi obaveza da određena dokumentacija mora biti ovjerena od strane notara, koje su u potpunosti u suprotnosti sa Presudom Ustavnog suda Broj:U-15/10. Navedenom Presudom član 6. te čl. 27. i 73. Zakona o notarima proglašavaju se neustavnim (ispis presude u prilogu). Dakle, neprihvatljivo je da predlagači akata u FBiH pored postojanja navedene Presude i dalje u zakonskim i podzakonskim aktima propisuju obavezu notarske ovjere dokumenta.

Imajući u vidu navedeno smatramo **da je ovakav način registracije složen, komplikovan i potpuno zastario te da je ovjeravanje dokumentacije bespotrebna a obaveza notarske ovjere neustavna.**

**Shodno navedenom, zahtijevamo da se navedeni Pravilnik izmjeni u smislu da se obezbijedi da nadležna Porezna Uprava dodjeljuje ID broj na zahtjev stranke, ali da potrebnu dokumentaciju nadležna PU pribavlja službenim putem od strane organa koji vrše registraciju. Ovakvo rješenje ima Republika Hrvatske koja je poresku reformu izvršila u skladu sa zahtjevima EU.**

## **KONKRETNE PRIMJEDBE UPFBIH NA PRAVILNIK O DODJELJIVANJU ID BROJEVA**

### **Član 3. glasi: (Poslovna jedinica)**

- (1) Poslovna jedinica pravnog lica je dio pravnog lica koji obavlja poslovanje u cijelosti i djelimično putem stalnog mjesta poslovanja, neovisno da li je mjesto poslovanja u vlasništvu pravnog lica ili se unajmljuje ili je na raspolaganju tom pravnom licu.
- (2) Svojestvo poslovne jedinice pravnog lica dodjeljuje se i dijelu pravnog lica koje je uspostavljeno na različitoj geografskoj lokaciji od sjedišta pravnog lica ili čije je poslovanje uzajamno i komercijalno povezano (kohezivno) i služi u svrhu poslovanja tog pravnog lica.
- (3) Sjedište uprave smatra se stalno mjesto poslovanja iz kojeg se upravlja bilo kojim poslovnim aktivnosti pravnog lica, uključujući, a ne ograničavajući se na upravu pravnog lica ili njen drugi organ sličnih funkcija.
- (4) Podružnica pravnog lica smatra se stalno mjesto poslovanja pravnog lica putem kojeg se obavlja glavna djelatnost pravnog lica i/ili za čije je postojanje potrebno odrediti odgovorno lice za zastupanje u pravnom prometu. Podružnica se upisuje u registar nadležnog registracijskog organa.
- (5) Kancelarija pravnog lica smatra se stalno ili povremeno mjesto poslovanja putem kojeg pravno lice pruža ili prikuplja informacije.
- (6) Uplatnim mjestom pravnog lica smatra se stalno mjesto poslovanja pravnog lica putem kojeg se obavlja poslovna aktivnost zaprimanja novca ili novčanih ekvivalenata, a usluga se realizira u sjedištu pravnog lica (npr. uplata mjesta kladionica, pružaoca telekomunikacijskih usluga i sl.).
- (7) Tvornica ili radionica pravnog lica smatra se stalno mjesto poslovanja pravnog lica putem kojeg se obavlja isključivo proizvodna ili prerađivačka aktivnost pravnog lica, putem opreme ili postrojenja koja su smještena na tom mjestu.
- (8) Instalacije, platforme, bušne platforme ili brodovi koji se koriste za eksploataciju prirodnih resursa, čine također stalno mjesto poslovanja.
- (9) Gradilište ili građevinski ili instalaterski projekt smatra se stalno mjesto poslovanja pravnog lica putem kojeg pravno lice obavlja svoje aktivnosti. Period se obračunava za svaki projekt posebno, od početka aktivnosti, uključujući aktivnosti pripreme, i privremeni prekidi. Činjenica da su radovi vršeni od različitih lica i podizvođača nisu značajni.

(10) Skladište pravnog lica smatra se stalno ili povremeno mjesto poslovanja koje pravno lice koristi isključivo u svrhu skladištenja, izlaganja ili isporuke proizvoda ili roba koje pripadaju tom pravnom licu, a pod uslovom da je cjelokupna djelatnost stalnog mjesta poslovanja pripremnog ili pomoćnog karaktera.

### **Član 1.**

**U Pravilniku o dodjeljivanju identifikacionih brojeva, registraciji i identifikaciji i evidencijama poreznih obveznika na teritoriji Federacije Bosne i Hercegovine („Službene novine Federacije BiH“, broj 69/17) član 3. se briše.**

### **Obrazloženje**

**Definisanje pojmova poslovnih jedinica nije predmet podzakonskog akta. Imajući u vidu da Zakon o privrednim društvima i Zakon o registraciji poslovnih subjekata definiše pojmove privrednog subjekta kao i pojam podružnice sasvim je neprihvatljivo da se podzakonskim aktom definišu pojmovi poslovnih jedinica.**

**Podzakonski akt ne može definisati šta je podružnica privrednog subjekta. Definirati podzakonskim aktom podružnicu privrednog društva je potpuno apsurdno. Zakon o privrednim društvima definiše šta se smatra podružnicom privrednog društva i ovaj Pravilnik to ne može definisati. Postavlja se pitanje šta je bila namjera donosiocu akta?**

**Također u članu 1. je definisano da ovaj Pravilnik propisuje postupak dodjele ID broja poreskog obveznika. U članu 2. definiše pojam da je porezni obveznik pravno ili fizičko lice koje je obveznik obračuna ili prijave ili uplate javnih prihoda u skladu sa posebnim propisima na teritoriju FBiH.**

**Postavlja se pitanje da li sjedište uprave, uplatno mjesto, tvornica i radionica, instalacije, platforme, bušne platforme te gradilište i skladište koje su definisane u članu 3. imaju svojstvo pravnog lica?**

**Dakle, ukoliko nemaju svojstvo pravnog lica i nisu u obavezi da se registruju po drugim Zakonima onda je sasvim nelogično da se nameće obaveza da te poslovne jedinici imaju identifikacioni broj. Također obaveznik obračuna ili prijave i uplate javnih prihoda je pravni subjekt a ne poslovna jedinica.**

### **Članak 4.**

**(Osobe koje posjeduju identifikacijski broj poreznog obveznika)**

**Obvezu posjedovanja identifikacijskog broja poreznog obveznika imaju sljedeće osobe:**

**a) pravne osobe sa sjedištem u Federaciji uključujući, a ne limitirajući se na gospodarsko društvo i njegove dijelove, ustanove, fondacije, udruge, predstavništva, domaće i međunarodne organizacije, organe uprave, upravne organizacije i ostale organizacije i sve**

druge osobe koje se upisuju kod nadležnog registracijskog organa.

b) poslovne jedinice pravnih osoba sa sjedištem u Republici Srpskoj ili Brčko Distriktu Bosne i Hercegovine (u daljnjem tekstu: Brčko Distrikt),

c) poslovne jedinice nerezidentne pravne osobe,

d) nerezidentna pravna osoba,

e) samostalni poduzetnik sa sjedištem u Federaciji,

f) nerezidentna fizička osoba koje ostvaruje prihode u Federaciji,

g) rezidentna fizička osoba koja ostvaruje prihode u Federaciji,

h) fizička osoba koja ima prebivalište odnosno boravište na teritoriju Republike Srpske ili Brčko Distrikta, a ostvaruje prihode na teritoriju Federacije.

## **Član 2.**

U članu 4. stav 1. mijenja se i glasi:

Obveznici registracije su lica koja su u skladu sa zakonom poreski obveznici i to pravna lica, organi uprave, upravne organizacije, ostale organizacije, fizička lica –poduzetnici (u daljem tekstu poduzetnici), ustanove, fondacije, udruge, predstavništva, domaće i međunarodne organizacije, i sve druge osobe koje se upisuju kod nadležnog registracijskog organa.

## **Objasnenje**

Isto kao u prethodnom članu predlažemo da se obaveznici posjedovanja ID broja vežu za porezne obveznike koji se upisuju kod nadležnog registracijskog organa. Dakle ukoliko se registruju kod nadležnog organa logično je da je obveznik posjedovanja ID broja.

## **Član 13. glasi: (Privredna društva)**

(1) Privredna društva i poslovne jedinice za čiju registraciju je nadležan sud, dužna su pokrenuti postupak registracije iz člana 12. stav (1) ovog pravilnika u roku od 5 radnih dana od dana registracije (upisa u sudski registar) kod nadležnog suda podnošenjem odgovarajuće prijave - Obrazac POR-500 ili Obrazac POR-501 i dokumentacije propisane ovim pravilnikom.

(2) Obrazac POR-500 ili Obrazac POR-501 se dostavlja nadležnoj jedinici Porezne uprave prema mjestu sjedišta rezidentnog privrednog društva odnosno adresi poslovne jedinice privrednog društva iz Republike Srpske ili Brčko Distrikta ili adresi nerezidentne poslovne jedinice.

(3) Novoosnovano privredno društvo Obrazac POR-500 dostavlja zajedno sa sljedećom

dokumentacijom:

a) rješenje nadležnog suda (ovjerena kopija) ili kopiju pripadajućeg djela teksta iz službenih novina,

b) ugovor o vođenju računovodstvenih poslova samo u slučaju kada poslovne knjige vodi drugo pravno ili fizičko lice (ovjerena kopija ili original),

c) dokaz o pravnom osnovu korištenja poslovnog prostora (ovjerena kopija ili original),

d) identifikacioni dokument podnosioca zahtjeva (na uvid) ili punomoć za podnošenje obrasca za punomoćnika (original ili ovjerena kopija).

(4) Privredno društvo za svaku novoosnovanu poslovnu jedinicu Obrazac POR-501 dostavlja zajedno sa dokumentacijom iz stava (3) tač. a), c) i d) ovog člana.

(5) Podružnice nerezidentnih pravnih lica, pored dokumenata iz stava (3) tač. a), c) i d) ovog člana dostavljaju i:

a) pisanu izjavu o načinu obavljanja djelatnosti koja sadrži opis aktivnosti koji se obavlja u Federaciji od osnivača koja mora biti na jednom od službenih jezika Bosne i Hercegovine (ovjerena od strane sudskog tumača). Izjava mora da sadrži i sljedeće podatke: broj i naziv registra u kojem je upisan osnivač, datum upisa u registar, naziv države, oblik organizovanja osnivača, dodjeljena strana šifra djelatnosti i osnovni kapital osnivača sa valutom.

b) listu zaposlenih lica,

c) ugovor o vođenju računovodstvenih poslova samo u slučaju kada poslovne knjige vodi drugo pravno ili fizičko lice (ovjerena kopija ili original).

(6) Privredna društva koja vrše statusne promjene (podjelu, spajanje ili pripajanje) u skladu sa propisima kojim se uređuju privredna društva, dužna su u roku od 5 radnih dana od dana upisa statusne promjene kod nadležnog suda dostaviti nadležnoj jedinici Porezne uprave Obrazac POR - 500 i sljedeću dokumentaciju:

a) za novoosnovana privredna društva nastala spajanjem ili podjelom, dokumentaciju iz stava (3) ovog člana,

b) za privredno društvo - pravni slijednik pripojenog društva, dokumentaciju iz stava (3) tač. a) i d) ovog člana,

c) za privredna društva koja se brišu dokumentaciju iz stava (3) tač. a) i d) ovog člana,

d) u prilogu dokumentacije iz tač. b) i c) ovog stava, porezni obveznici dostavljaju i osnivački akt koji sadrži iznos poreznih obaveza koje preuzimaju novoosnovana privredna društva i privredna društva pravne slijednike.

(7) Ukoliko se na osnovu uredno podnesenih Obrazaca POR-500 ili Obrazac POR-501 i dokumentacije utvrdi da privredno društvo ili poslovna jedinica ispunjava uslove za dodjeljivanje PJIB-a, nadležna jedinica Porezne uprave će dodijeliti PJIB u skladu sa odredbama člana 7. ovog pravilnika, te izdati Uvjerenje o registraciji poreznih obveznika u roku od 5 radnih dana.

(8) Izuzetno od stava (7) ovog člana, uslijed preseljenja sjedišta privrednog društva sa teritorije Republike Srpske ili Brčko Distrikta u Federaciju, dodijeljeni identifikacioni broj od strane poreznih administracija iz Republike Srpske ili Brčko Distrikta se zadržava. Struktura PJIB za podružnicu pravnog lica koje je svoje sjedište preselilo iz Republike Srpske ili Brčko Distrikta u Federaciju, se određuje prema članu 7. st.(1) i (2) ovog pravilnika.

### **Član 3.**

**U članu 13 u stavu 3. u tački a) i b) riječi „ovjerena “ se brišu.**

**U istom članu u stavu 3. tačke c) i d) se brišu.**

**U stavu 4. riječi „c) i d) “ se brišu.**

**U stavu 5. riječi „c) i d) se briše.**

**U stavu 5. tačke b) i c) brisati.**

**U stavu 6. u tački B) i c) slova „d) „ se brišu.**

### **Obrazloženje**

Predloženo rješenje predstavlja klasični parafiskalni namet obzirom da se uvodi niz dokumentacije koju je potrebno priložiti uz prijavu za dodjelu ID broja. Također potrebna dokumentacija mora biti ovjerena. Obzirom da se ovjera plaća ovo predstavlja dodatni trošak za poslodavca. Na ovaj način dolazi do poskupljenja registracije i novih opterećanja za poslodavce.

Smatramo da je sasvim nepotrebno uvoditi dodatnu dokumentaciju posebno imajući u vidu član 16. Zakona o poreznoj upravi koji definiše dužnost poreznih obveznika na registraciju kod Porezne uprave u mjestu, u roku i na način utvrđen u Zakonu. Također u istom članu je definisano da Porezni obveznik - pravno lice i organizacija u prilogu prijave za registraciju dostavlja poreznom organu rješenje o sudskoj registraciji sa priložima i izvod iz sudskog registra. Dakle, Zakon je propisao obaveznu dokumentaciju koju dostavlja porezni obveznik.

Dalje, Zakonom je propisano da će se podzakonskim aktima utvrditi Obrazac prijave za registraciju. Postavlja se pitanje zašto podzakonski akt uvodi novu dokumentaciju za registraciju??

Također, prema članu 74. Zakona o registraciji poslovnih subjekata FBiH registracijski sud je obavezan prijavu za upis osnivanja subjekta upisa i upis dijela, odmah dostaviti nadležnom poreznom organu prema sjedištu subjekta upisa za dobijanje poreznog identifikacijskog broja. Shodno navedenom smatramo da je sasvim neprihvatljivo i neopravdano da se propisuje obaveza podnošenja prijave za dodjelu ID broja.

Analiza zemlaja u okruženju pokazuje da niti jedna zemlja u okruženju nema ovakva komplicirana rješenja i komplicirane procedure, koje dovode do odugovlačenja i poskupljenja postupka registracije firmi. Također bitno je napomenuti Hrvatska koja je članica EU, ne propisuje obavezu dostavljanja dodatne dokumentacije pored rješenja o upisu u registar. Prema Rješenju u Hrvatskoj porezna Uprava Rješenje o registraciji pribavlja službenim putem. Poslodavac se dakle registruje a, Porezna uprava po službenoj dužnosti određuje i dodjeljuje osobni identifikacijski broj na osnovu informacije nadležnog tijela koje obavlja prvi upis.

U cilju pojednostavljenja procedura za registraciju a što je predviđeno i reformskom agendom predlažemo izmjenu ovog člana u skladu sa primjedbom.

#### **Član 14. (Organizacija)**

(1) Organizacija je dužna pokrenuti postupak registracije iz člana 12. stav (1) ovog pravilnika u roku od 5 radnih dana od dana registracije (upisa u registar) kod nadležnog registracijskog organa podnošenjem Obrasca POR-500, Obrasca POR-501 ili Obrasca POR-502 i dokumentacije propisane ovim pravilnikom.

(2) Obrasci iz stava (1) ovog člana dostavljaju se nadležnoj organizacionoj jedinici Porezne uprave prema mjestu sjedišta rezidentne organizacije odnosno adresi poslovne jedinice organizacije iz Republike Srpske ili Brčko Distrikta ili adresi nerezidentne poslovne jedinice.

(3) Organizacije iz stava (1) ovog člana uz Obrazac POR-500, Obrazac POR-501 ili Obrazac POR-502 dostavljaju sljedeću dokumentaciju:

a) rješenje nadležnog suda (ovjerena kopija) ili kopija pripadajućeg dijela teksta iz službenih novina ili dokument izdat od nadležnog organa iz Bosne i Hercegovine, kojim se potvrđuje osnivanje (ovjerena kopija),

b) lista zaposlenih lica za diplomatska i konzularna predstavništva, misije i međunarodne organizacije,

c) ugovor o vođenju računovodstvenih poslova samo u slučaju kada poslovne knjige vodi drugo pravno ili fizičko lice (ovjerena kopija ili original),

d) dokaz o pravnom osnovu korištenja poslovnog prostora (ovjerena kopija ili original),

e) identifikacioni dokument podnosioca zahtjeva (na uvid) ili punomoć za podnošenje obrasca za punomoćnika (original ili ovjerena kopija),

(4) Ukoliko se na osnovu uredno podnesenih obrazaca i dokumentacije utvrdi da organizacija ispunjava uslove za dodjeljivanje PJIB-a, nadležna organizaciona jedinica Porezne uprave će dodijeliti PJIB u skladu sa odredbama čl. 7. i 8. ovog pravilnika, te izdati Uvjerenje o registraciji poreznih obveznika u roku od 5 radnih dana.

(5) Izuzetno od stava (4) ovog člana, uslijed preseljenja sjedišta organizacije sa teritorije Republike Srpske ili Brčko Distrikta u Federaciju, dodijeljeni identifikacioni broj od strane poreznih administracija iz Republike Srpske ili Brčko Distrikta se zadržava.

#### **Član 4.**

**U članu 14 u stavu 3. u tački a) riječi „ovjerena kopija“ se brišu.**

**U istom članu u stavu 3. tačke b. i c. i d se brišu.**

**U stavu 3. u tački e) riječi „original ili ovjerena kopija“ se zamjenjuju sa riječima „kopija“**

#### Obrazloženje

**Obrazloženje kao u prethodnom članu.**

**Član 18. glasi:**

**(Samostalni poduzetnik)**

(1) Fizičko lice - samostalni poduzetnik dužan je pokrenuti postupak registracije iz člana 12. stav (1) ovog pravilnika u roku od 5 radnih dana od dana registracije kod nadležnog registracijskog organa podnošenjem prijave - Obrasca POR-503.

(2) Obrazac POR-503 podnosi se nadležnoj organizacionoj jedinici Porezne uprave gdje se nalazi sjedište tog fizičkog lica. U slučaju da ne postoji sjedište, registracija će se vršiti kod nadležne organizacione jedinice Porezne uprave u čiju nadležnost spada poslovni ili stambeni prostor iz kojeg se upravlja poslovnim aktivnostima.

(3) Fizičko lice - samostalni poduzetnik uz Obrazac POR-503 dostavlja sljedeću dokumentaciju:

a) dokument izdat od nadležnog registracijskog organa kojim se potvrđuje osnivanje (ovjerena kopija),



b) ugovor o vođenju računovodstvenih poslova samo u slučaju kada poslovne knjige vodi drugo pravno ili fizičko lice i kad postoji obaveza vođenja poslovnih knjiga (ovjerena kopija ili original),

c) dokaz o pravnom osnovu korištenja poslovnog prostora (ovjerena kopija ili original),

d) identifikacioni dokument podnosioca zahtjeva (na uvid) ili punomoć za podnošenje obrasca za punomoćnika (original ili ovjerena kopija).

(4) Ukoliko se na osnovu uredno podnesenog Obrasca POR-503 i dokumentacije utvrdi da lice iz stava (1) ovog člana ispunjava uslove za dodjeljivanje FJIB-a, nadležna organizaciona jedinica Porezne uprave će dodijeliti FJIB u skladu sa odredbama člana 10. ovog pravilnika, te izdati Uvjerenje o registraciji poreznih obveznika u roku od 5 radnih dana.

#### **Član 5.**

**U članu 18 u stavu 3. u tački a) riječi „ovjerena kopija“ se brišu.**

**U istom članu u stavu 3. tačke b. i c. se brišu.**

**U stavu 3. u tački d) riječi „original ili ovjerena kopija“ se zamjenjuju sa riječima „kopija“**

#### **Obrazloženje**

**Obrazloženje kao za prethodne članove.**

**Član 19. glasi:**

**(Predregistracija)**

(1) Na zahtjev nadležnog suda Porezna uprava će dodijeliti pripadajući identifikacioni broj poreznog obveznika (PJIB) nakon što utvrdi da njegov osnivač ili vlasnik nema neizmirenih poreznih obaveza iz njene nadležnosti.

(2) Ukoliko Porezna uprava utvrdi da osnivač ili vlasnik ima neizmirenih poreznih obaveza, Porezna uprava će obustaviti proces dodjeljivanja identifikacionog broja poreznog obveznika dok se ne izvrši izmirivanje poreznih obaveza.

(3) Porezna uprava je dužna odgovoriti u roku od 24 sata od sata prijema zahtjeva nadležnom sudu. Komunikacija između suda i Porezne uprave odvija se elektronskim putem.

(4) Postupak obustave dodjeljivanja identifikacionog broja može trajati najduže 12 mjeseci od dana zahtjeva suda. Nakon isteka perioda, Porezna uprava je dužna obavijestiti nadležni sud o ishodu zahtjeva za dodjeljivanje identifikacionog broja.

## **Član 6.**

U članu 19. stav 2. se briše.

## **Obrazloženje**

Članom 19. uvodi se novi pojam predregistracije. Na ovaj način se sprječava, da vlasnik ili osnivač novog Privrednog društva ukoliko ima neizmirenih poreznih obaveza, dobije ID broj jer PU u takvoj situaciji obustavlja proces dodjeljivanja ID broja. Predloženo Rješenje je u potpunosti u suprotnosti sa članom 74. Zakona o registraciji poslovnih subjekata prema kojem u slučaju dostavljena poreznog identifikacijskog broja od poreskog organa sud neće zahtijevati prilaganje bilo kakvih drugih dokaza o postojanju i/ili izmirenju poreznog duga. Na ovakav način se Pravilnikom derogiraju odredbe Zakona koji definiše ovu materiju.

## **Član 22.**

### **(Promjena podataka)**

(1) Lice kojem je dodijeljen PJIB i FJIB u skladu sa odredbama ovog pravilnika dužno je prijaviti svaku promjenu podataka koja je u vezi s dokumentima koji se zahtijevaju prilikom dodjele identifikacionog broja, a posebno podataka koji se upisuju u registar drugog nadležnog registracijskog organa, izmjene podataka o licu koje vodi poslovne knjige i izmjene podataka o poslovnom prostoru.

(2) Ukoliko lice ne prijavi promjenu podataka iz stava (1) ovog člana, nadležna organizaciona jedinica Porezne uprave po službenoj dužnosti vrši prijavu kad utvrdi da je do takve promjene došlo.

(3) Prijava o promjeni sjedišta ili adrese poslovanja podnosi se mjesno nadležnoj organizacionoj jedinici Porezne uprave novog sjedišta ili adrese poslovanja na obrascima iz člana 1. stav (2) ovog pravilnika.

(4) U slučaju iz stava (3) ovog člana Porezna uprava će svojim internim procedurama rada urediti tok dokumentacije u vezi s registracijom tog lica.

(5) Uslijed promjene podataka kojima se mijenja izgled i podaci iz Uvjerenja o registraciji poreznih obveznika, mjesno nadležna jedinica Porezne uprave izdaje novo Uvjerenje o registraciji poreznih obveznika sa promijenjenim podacima u roku od 2 dana od dana prijema dokumentacije. Lice uz propisani obrazac dostavlja i dokument koji je mijenjan.

(6) Uslijed promjene sjedišta ili adrese poslovanja lica kojima je dodijeljen PJIB i FJIB sa teritorije Federacije na teritoriju Republike Srpske ili Brčko Distrikta, ta lica dužna su

izmiriti sve porezne obaveze. Porezna uprava u tom slučaju ne može brisati dodijeljeni PJIB i FJIB.

## Član 7.

### Član 22. se briše

## Obrazloženje

Ne postoji nikakav opravdan razlog za propisivanje obaveze da lica koja imaju ID u slučaju promjene podataka o tome obavještavaju PU. Sasvim je nepotrebno propisivati postupak obaveze i obavještavanja PU u slučaju promjene podataka. Prema članu 67. Zakona o registraciji poslovnih subjekata svaki poslovni subjekt je obavezan promjene prijaviti nadležnom sudu za registraciju. Dakle, kada dođe do promjene podataka svaki poslovni subjekt obavještava nadležni registracioni sud. Registracioni sud informiše PU i druge organe i po službenoj dužnosti dostavlja podatke drugim organima.

Dakle, Donošenje ovog Pravilnika je trebao da ima za cilju rasterećenje privrede i pojednostavljenja procedura. Međutim ovaj Pravilnik je samo dodatni namet na privrednika jer uvodi nove procedure koje zaista nemaju nikakvu svrhu. Na ovaj način se u stvari rasterećavaju radnici PU jer nisu oni dužni da provjeravaju podatke a što im je u stavri I obaveza. S tim u vezi predlažemo da se navedeni član briše.

## Član 25.

### (Porezna identifikacija poslovnih jedinica)

(1) Privredno društvo i organizacija će za poslovne jedinice iz člana 3. st. (3), (5), (6), (7), (8), (9) i (10) ovog pravilnika za čiju registraciju nije nadležan registracijski organ, pokrenuti postupak dodjeljivanja identifikacionog broja prije početka obavljanja poslova, podnošenjem Obrasca PI-505 u jednom primjerku i sljedeće dokumentacije:

a) odluka rezidentnog privrednog društva/organizacije za osnivanje dijela pravnog lica (ovjerena od strane notara),

b) javna isprava o osnivanju pravnog lica nerezidenta prema propisima države porijekla pravnog lica - osnivača (ovjerena od strane notara),

c) rješenje nadležnog organa uprave ukoliko je djelatnost pravnog lica uređena posebnim propisima (ovjerena kopija),

d) dokaz o pravnom osnovu korištenja poslovnog prostora (ovjerena kopija ili original),

e) identifikacioni dokument podnosioca zahtjeva (na uvid) ili punomoć za podnošenje obrasca za punomoćnika (original ili ovjerena kopija)

f) dozvola za rad i prijava boravišta, izdata od nadležnih organa za odgovorno lice - stranog državljanina ukoliko je ima,

g) lista zaposlenih nerezidentnih lica koja su zaposlena u poslovnoj jedinici nerezidenta.

h) potvrda banke o otvorenom transakcionom računu za poslovne jedinice nerezidenta (ne starija od mjesec dana).

(2) Odluka iz stava (1) tačka a) ovog člana treba da sadrži minimalno sljedeće podatke: naziv i adresu poslovne jedinice, podatke o obavljanju djelatnosti poslovne jedinice i odgovorno lice.

(3) Prijava za dodjeljivanje identifikacionog broja se dostavlja nadležnoj jedinici Porezne uprave prema adresi nerezidentne poslovne jedinice odnosno sjedištu rezidentnog pravnog lica.

(4) Ukoliko se na osnovu uredno podnesene prijave i dokumentacije utvrdi da poslovna jedinica ispunjava uslove za dodjeljivanje identifikacionog broja, nadležna organizaciona jedinica Porezne uprave će dodijeliti identifikacioni broj poreznom obvezniku u skladu sa odredbama čl. 7. i 9. ovog pravilnika, te izdati Potvrdu o dodijeljenom identifikacionim broju poreznom obvezniku u roku od 5 radnih dana. U suprotnom, Porezna uprava će upoznati poreznog obveznika o njegovim pravima i obavezama.

(5) Ukoliko se na osnovu podnesene prijave i dokumentacije utvrdi nedostatak, Porezna uprava će obavijestiti podnosioca prijave i pozvati na otklanjanje nedostatka. Podnosilac prijave će otkloniti nedostatak u roku od 3 dana, u suprotnom će se smatrati da prijava nije ni podnesena.

## **Član 8.**

### **Član 25.mjenja se i glasi:**

Porezna identifikacija poslovnih jedinica u sastavu pravnog lica ili organizacije na teritoriju FBiH vrši se na osnovu prijave na Obrascu PI-505, a po odredbama člana 13. ovog pravilnika, prema sjedištu pravnog lica ili organizacije u čiji sastav podružnice ili jedinice ulaze.

## **Objasloženje**

Prema predloženom Rješenju uvodi se porezna identifikacija za sjedište uprave, kancelariju pravnog lica, uplatno mjestom pravnog lica, tvornica ili radionica pravnog lica, instalacije, platforme, bušne platforme ili brodovi, te gradilište, građevinski, instalaterski projekt i skladište pravnog lica. Međutim, pored proširenja dodjele ID broja i poslovnim jedinicama,

poslodavcima se uvodi i dodatni namet budući da je određene dokumente na osnovu kojih se dodjeljuje PI potrebno ovjeriti od strane notara.

Za Udruženje poslodavaca je neprihvatljivo rješenje da se novim propisima uvodi obaveza ovjera dokumenta od strane notara s obzirom na činjenicu da postoji Presuda Ustavnog suda Broj:U-15/10 koja je objavljena u službenim novinama FBiH broj 30/16. U navedenoj Presudi Ustavni sud proglašava član 6. te čl. 27. i 73. Zakona o notarima neustavnim. Dakle, u presudi se navodi da zakonodavac osporenim odredbama Zakona uskraćuje pravo građanima i pravnim licima da po vlastitom izboru odlučuju da li će odgovarajuće usluge zatražiti od advokata ili notara i upućuje ih notarima na koji način, suprotno evropskom, a i domaćem konkurencijskom pravu, uspostavlja monopolski položaj notara za izuzetno širok krug pravnih poslova i radnji, za čije obavljanje su jednako kompetentni i advokati. Dakle, neprihvatljivo je da predlagači akata u FBiH pored postojanja navedene Presude i dalje u zakonskim i podzakonskim aktima propisuju obavezu notarske ovjere dokumenta.

Shodno navedenom predlažemo da se registracija poslovnih jedinica kao što smo rekli u obrazloženju za izmjenu člana 4. veže za poreznog obaveznika koji je obavezan registrovati se u sudu i u tom smislu treba da se vrši po istom postupku kao i novoosnovane kompanje.

**Član 27. galasi:  
(Odjava identifikacionog broja)**

(1) Lice kojem je izdato Uvjerenje o registraciji poreznih obveznika, a koje prestaje sa obavljanjem djelatnosti odnosno aktivnosti dužno je pokrenuti postupak odjave identifikacionog broja u roku od 5 radnih dana od dana brisanja kod nadležnog registracijskog organa podnošenjem odgovarajućeg obrasca.

(2) Poslovna jedinica kojoj je izdata Potvrda o dodijeljenom identifikacionom broj putem postupka porezne identifikacije, a koja prestaje sa obavljanjem djelatnosti odnosno aktivnosti dužna je pokrenuti postupak odjave identifikacionog broja u roku od 5 radnih dana od dana prestanka aktivnosti.

(3) Lice iz st. (1) i (2) ovog člana uz odgovarajući obrazac dostavlja i sljedeću dokumentaciju:

a) rješenje nadležnog registracijskog organa (ovjerena kopija) ili kopija pripadajućeg dijela teksta iz službenih novina ili dokument izdat od nadležnog organa Bosne i Hercegovine, kojim se potvrđuje brisanje (ovjerena kopija) za lica iz stava (1) ovog člana,

b) odluka pravnog lica za brisanje dijela pravnog lica (ovjerena kod notara) za poslovne jedinice iz člana 3. st. (3), (5), (6), (7), (8), (9) i (10) ovog pravilnika, za lica iz stava (2) ovog člana,

c) rješenje nadležnog organa uprave ukoliko je djelatnost pravnog lica uređena posebnim propisima za lica iz stava (1) ovog člana,

d) identifikacioni dokument podnosioca zahtjeva (na uvid) ili punomoć za podnošenje obrasca za punomoćnika (original ili ovjerena kopija).

(4) Pravno lice koje prestaje sa obavljanjem djelatnosti, ali je preselilo sjedište iz Republike Srpske ili Brčko Distrikta u Federaciju, uz dokumentaciju iz stava (3) ovog člana, dostavlja i zadnji izvod o registraciji poslovnih subjekata u Republici Srpskoj ili Brčko Distriktu.

(5) Postupak odjave identifikacionog broja može biti pokrenut od strane poreznog obveznika ili osnivača ili vlasnika ili zastupnika (lice ovlašteno za zastupanje upisano u odgovarajući registar) ili punomoćnika (lice ovlašteno po punomoći), te od zaposlenika Porezne uprave po službenoj dužnosti.

## **Član 9.**

### **Član 27. mijenja se i glasi:**

Nadležni sud koji registrira pravna lica u skladu sa Zakonom o registraciji poslovnih subjekata u FBiH, odnosno organ koji je prema federalnim zakonima nadležan za registraciju drugih organizacija, obavještava nadležni kantonalni ured Porezne uprave i kantonalni ured/službu Zavoda o registraciji u slučaju odjave i prestanak obavljanja djelatnosti koju je obavezan prijaviti sudu.

## **Obrazloženje**

Navedenom odredbom uvodi se obaveza odjave ID broja. Pored zahtjeva za odjavu propisuje se obaveza dostavljanja dodatne dokumentacije koja mora biti ovjerena. Ovjera dodatne dokumentacije zahtjeva dodatno vrijeme i troškove. Potpuno je neopravdano da se poslodavcu stavlja na teret da je pored obaveze odjavljivanja u registracionom sudu dužan i da dostavlja dokumentaciju i odjavu u PU. Dakle svaki pravni subjekt je dužan registracionom sudu prijaviti odjavu i prestanak obavljanja djelatnosti. S tim u vezi predlažemo da se propise da je nadležni sud obavezan dostaviti informaciju PU a da onda PU po službenoj dužnosti pribavlja potrebne podatke za odjavu.

Dakle, Porezna uprava bi trebala po službenoj dužnosti da obezbijedi i promjene podataka i prestanak obavljanja djelatnosti.